

RAI KEJAYAAN PELAJAR PROGRAM PRA IJAZAH SAINS UMK


Dr. Aainaa Syazwani Mohamad Amir Hamzah

Syabas dan tahniah diucapkan kepada kesemua 28 pelajar perintis program Pra Ijazah Sains UMK sesi 2020/2021! Majlis Pensijilan Program Pra Ijazah Sains UMK yang telah diadakan pada 22 April 2021 secara *virtual* merupakan satu majlis yang istimewa khususnya bagi para pelajar serta ibu bapa mereka. Majlis ini telah dirasmikan oleh Timbalan Naib Canselor Akademik, Prof. Dr. Mohd Rafi bin Yaacob.

Majlis ini telah membuktikan bahawa para pelajar ini merupakan insan-insan yang gigih dan telah berusaha keras untuk belajar bagi mendapatkan segulung sijil. Ini merupakan satu kejayaan yang patut dibanggakan kerana bukan semua anak-anak muda memilih untuk meneruskan pengajian selepas tamat alam persekolahan.



Golongan muda perlu diberi akses kepada pendidikan yang berkualiti dan sama rata. Sehubungan dengan itu, Program Pra Ijazah Sains UMK ini disediakan untuk memberi peluang kedua kepada para pelajar lepasan STPM/Matrikulasi Sains yang tidak bernasib baik pada peluang yang pertama. JPSU melalui Program Pra Ijazah Sains ini akan sentiasa berusaha untuk mempertingkatkan pengajaran dan pembelajaran dalam setiap kursus, disamping memberi penekanan kepada pembangunan insaniah dari aspek kerohanian, kemahiran berkomunikasi, kemahiran berpasukan, dan kepimpinan. Dengan usaha yang telah dilakukan di Jabatan Persediaan Sains UMK, kami yakin dapat melahirkan pelajar yang mahir dalam akademik, malah mempunyai sifat peribadi yang baik.



BuletinFSB

Namun demikian, para pelajar dinasihati agar tidak terus berpuas hati apabila sudah melanjutkan pengajian ke Ijazah Sarjana Muda. Usaha berterusan perlu dilakukan bagi meningkatkan keupayaan diri dalam pelbagai aspek termasuklah teknikal. Pelajar perlu terapkan budaya pembelajaran sepanjang hayat selaras dengan aspirasi kerajaan dengan meneruskan usaha meningkatkan kelayakan akademik dan professional dalam bidang masing-masing. Dengan cara ini, para pelajar akan mempunyai peluang yang cerah untuk maju.

Semoga para pelajar yang telah bergelar pelajar UMK ini akan menjadi warga Malaysia yang bermanfaat kepada semua!

